



UNIVERSITÄTS-
BIBLIOTHEK
PADERBORN

Vita Et Doctrina Jesu Christi

Avancini, Niccolò

Coloniae Agrippinae, 1689

Hebdomada Septuagesimæ.

[urn:nbn:de:hbz:466:1-59970](https://nbn-resolving.org/urn:nbn:de:hbz:466:1-59970)

vitam meliorem, Deoque gratiores judicavit & elegit. O sinistra hominum judicia, quibus hæc vita extremum malorum est! dum pati fugiunt, perdunt animas suas, quæ solâ patientiâ possidentur. Et quid est, quod tu pateris, quàm leve? quàm nihil, si cum eo conferas, quod prior ille passus est! Ad quid te resolves?

DOMIN. SEPTUAGESIMÆ.

Decretum SS. Trinitatis, ut Christus moriatur.

1. **Q**uid facimus? Joan. 11. Cogita te interesse consilio SS. Trinitatis consultantis, sitne perdendus homo, ut meruerat; an morte Dei hominis redimendus. Quid facimus? Cogita adesse justitiam divinam, quæ enormitatem delicti exaggerat. Quia homo Deum vilipendet, cujus præceptum transgressus est. 2. Quia præceptum hoc erat observatu facile. 3. Quia hoc ex malitia fecit, cum esset adedò illuminatus, fultus gratiâ, & sine passionum rebellionem. 4. Quia nec motus est rigore pœnæ transgressuro impositæ, nec exemplo Angelorum. Igitur non mereri misericordiam, sed justitiam. Agnosce hinc gravitatem peccati. Detestare. Time justitiam.

G

1. Co-

2. Cogita adesse misericordiam, approbare quidem omnia, quæ allegavit iustitia excusare tamen hominem, quod fragile sit, ex luto compositus, tentatus à dæmone, idque in despectum, & odium Dei. Agere ne perdatur, quia totum genus humanum perdendum esset: non ita omnino Angelos perditos: triumphaturum dæmonem, si homo damnetur: Deum habiturum nomen rigidi, non misericordis: cum misericordiæ nullus hæctenus fuerit locus, nullus futurus; Convenire denique Dei bonitati, ut placetur Exhibe te misericordie egentem, hanc invoca, lauda, gratias age, spera.

3. *Expedit, ut unus moriatur homo, ne tota gens pereat* Ibid. Cogita hanc esse Sacramentum Trinitatis conclusionem, quæ magis in misericordiam inclinatur, quàm in iustitiam. Quod justus enim fit, à nostra malitia habet; quod vero misericors, à sua bonitate. Cogita quàm expedit, & pro Dei gloria manifestanda, & pro hominum salute! Agnosce, adora, lauda, ama, time offendere hanc bonitatem, spera in eam. Sed quæ tua erit

in eam obligatio? quàm eam
amabis? quàm illi
servies?

F E R I A II.

Concilium Phariseorum adversus
Christum.

1. **C**ollegerunt Pontifices, & Pharisei concilium, & dicebant: Quid facimus? Joan. II. Qui coeunt? inimici Christi, invidi ejus gloriæ, quòd miracula patret, quòd à plebe honoretur. Quæ sana sententia expectari potest à judicibus odio & invidiâ excœcatis? Quo sine coeunt? *Ut Jesum dolo teneant, & occidant.* Hocne meritis est Christus, qui pertransivit omnibus beneficiendo? Quid fecisses, si illi consilio adfuisses? quo in iniquos illos zelo exarsisses? In te converte hæc tela. Tu contra eum sæpius conspirasti. Amor proprius convocavit concilium passionum: quibus quoties satisfacis, decernis adversus Dominum. Et hoc meretur per tot tibi impensa beneficia? O ingratitude!

2. *Hic homo multa signa facit* Ibid. Nec nominare eum dignantur, adeò vilem æstimant. Hoc initium est ruinæ, Deum non magni æstimare. Confitentur, quòd multa signa faciat, & tamen perditum eunt Jesum, quia timent regno temporali. Pluris hoc regnum æstimant, quàm Deum. O insania! sed tua. Quoties tu Deum, si non vilem, cerpe pro dignitate magnum æstimasti? vilia illi

tuarum passionum delectamenta antepo-
suisti? Cape hanc veritatem, unicum tuum
bonum esse, Deum amare, & illi soli servire.

2. *Expedi, ut unus moriatur homo.* Ibid.
Innocens, Propheta, patrator miraculo-
rum, Messias, non accusatus, non auditus,
non convictus: & tamen expedi ut mori-
atur, ne regnum pereat? O scelerate! non ex-
pedi tua, sed Dei sententia, qui impio tu
decreto ad bonum generis humani utitur.
Hæc Dei indoles est, ex pessimis optimam
erueret, Imitari potes, si ex tui contemp-
tuas humilitatem, ex afflictionibus patientiam,
ex creaturis Dei laudem. Ita diligenti-
bus Deum omnia cooperantur in bonum.
Rom. 8.

F E R I A III.

Cœna in Bethania à Martha & Maria
Christo exhibita.

1. **F**ecerunt autem ei cœnam ibi, & Mar-
tha ministrabat Joan. 12. Cœna hæc
facta est in domo Simonis leprosi post Lazari
zarum resuscitatum Christo in gratiarum
actionem. Martha ergo in domo aliena mi-
nistrabat Christo. Qui amat, ubique capit
occasionem amato ministrandi. Nullus
locus, nulla domus ad hoc peregrina est, &

iam spontè famulorum officium suscipit. At quot te prætereunt occasiones? Si amares, omnem venareris, ubivis, quovis tempore. Si hoc egisses semper, quàm gravis esses meritis? Non ægrè feras alios sedere in quiete, te autem ministerio fatigari. Diversis diversa mandantur merendi studia: istud tibi. Isto Deo places.

2. *Maria accepit libram unguenti nardi pistici pretiosi, & unxit pedes Iesu, & extersit capillis suis.* Ibid. Unxerat jam antea in sua conversione Christi pedes. Ungit hîc in gratiarum actionem de resuscitato Lazaro. Expende ad Christi pedes in aliorum præsentia projectæ humilitatem, sui contemptum, amorem, gratiarum actionem quæ pretiosissimum, quod habebat, Deo immolat. Attende, quam Christus habeat complacentiam, quam hujus actionis æstimationem? Affer & tu non vilia, non perfunctoria opera, sed pretiosa, pleno & interno affectu exhibita, quæ à Deo tam pretiosa accipis.

3. *Et domus impleta est ex odore unguenti.* Ibid. *Christi bonus odor sumus.* Cor. 2. aut saltem esse debemus. Odor operum nostrorum est ædificatio proximi. Eximia religiosi virtus totam unam domum replet hoc odore. Quò major es, eò magis hoc præsta. Majorum exempla trahunt minores. Vide

autem magis, ne de te queratur Deus: *Fæte-
re fecisti odorem nostrum.* Exod. 5. Si vel alio
exemplo sis malo, vel bono illudas.

F E R I A I V.

Murmur discipulorum de profuso
Magdalena unguento.

1. **V**identes autem discipuli indignati
sunt, dicentes. Matth. 26. Murmura-
bant de prodigalitate & indiscrecione Mag-
dalena, qui, quo affectu hoc ageret, non
videbant. Nunquam deerunt, qui de justo-
rum virtutibus sinistrè judicent, loquantur,
& in malum interpretentur, sive ignorantia,
sive malitia. Etiam boni suas formant
censuras zelo quandoque indiscreto, quid
si & superiores? Si vis bonus esse Religio-
sus, debes ad hæc animum parare. Ad judi-
cia Dei respice, hominum contemnes. *Isti
corticem vident; Deus medullam.* Cave au-
tem, ne & tu aliorum acta in malum inter-
preteris, dum potes in bonum.

2. *Dixit unus ex discipulis eius Judas Isca-
riotes.* Joan. 12. Matthæus & Marcus plu-
res murmurasse scribunt: Joannes unicum
Judam, Augustinus combinat, *eis iudæ di-
cente persuasum esse.* Ita murmurator unus
sæpè circulum integrum ad murmur trahit.

Cave

Cave tu incipias, cave incipiente alio prosequaris. Facies, si assuescas aliorum actiones apud te in bonum interpretari.

3. *Potuit enim unguentum istud venundari multo, & dari pauperibus.* Matth. 26. Ecce quod pallium obtexit iniquitati: quasi ei cura esset de pauperibus, qui fur erat, & prospiciebat furandi occasionem, si illud unguentum venditum fuisset. Ita vestiuntur plerumque malæ passionēs. Irasceris, vis zelum videri: familiaritati peculiari indulges, vis charitatem æstimari: effundis te ad solatia creaturarum, vis dici fructuosè conversari. Sed pallio hoc non tegeris apud Deum.

F E R I A V.

Christus defendit Magdalenam.

1. *Sciens autem Jesus ait: Quid molesti estis huic mulieri? opus enim bonum operata est in me.* Ibid. Semper Jesus advocatus est Mariæ. Luc. 7. contra Pharisæum peccatricem arguentem. Luc. 10. contra Martham de otio accusantem, Hic contra Judam murrantē. En quomodo semper virtus Deum habet patronum. Quod solatium hinc fuerit Magdalensæ adhuc novitiæ in via virtutis! Quantum fuerit animata! Quid te affligunt sinistra hominum iudicia, murmura, censuræ? nunquid propterea virtutem desereres absit, perge benè agere. Confide: Deum

habebis defensorem. Erit tempus, quo aperietur veritas cum tuo solatio majore.

2. *Nam semper pauperes habetis vobiscum, me autem non semper habebitis. Mittent enim hac unguentum in corpus meum, ad sepeliendum me fecit.* Ibid. Solvit rationem murmuris de cura pauperum. Non regerit Judæ intentionem furandi, quam noverat Dominus. Ut discas non te defendere per revelationem alienæ culpæ, infirmum innocentia tuæ argumentum est alterius culpa. Laudat deinde intentionem Magdalena, quod *prævenit ungere corpus suum.* Marc. 14. quod vel ex conversatione cum Christo, vel afflatu Spiritus sancti didicerat, se post mortem non uncturum. Placent ergò Deo præventa obsequia, quorum post non datur occasio. Sic omnem gratiam æstima, omnem occasionem arripe: quia nescis, an post futura sit.

3. *Vbicumque predicatum fuerit hoc Evangelium in toto mundo, dicetur, Et quod hac facit in memoriam ejus.* Ibid. Silebat Magdalena ad murmur Judæ: Ecce Dominus fideles omnes ad ejus præconium excitat. Adeò placet illi silentium humile inter calumnias. Unxerat aliàs Magdalena Christum. Luc. 7. Non promittitur illi operi memoria seculorum, quia erat adhuc incipiens in virtute: promittitur isti unctioni, quia
pro

progressa est in virtute, & ascendit ad caput usque Christi, quod illo unguento imbut, ibi autem solùm ad pedes hæsit: ibi erant purgativi affectus, hinc unitivi. Incipere necessarium est. sed progredi laudabile. Vide ergò ne sistas, quovis die incrementum adde.

F E R I A VI.

Ascendens Hierosolymam prædicat suam passionem.

1. **E**rant autem in via ascendentes Hierosolymam, & præcedebat illos Jesus, & stupebant. Debit insolita fuisse Christi properatio, quod stupuerint discipuli. Quæ verò ejus causæ? 1. Ut ostenderet quàm prompta voluntate ad patiendum feratur. Ad miracula edenda ordinario ibat passu, ad passionem accelerato. Amor addidit alas. Quàm lentus sum ego, quàm refractarius ad ardua! O trahe me post te. 2. Ut ostenderet se ad labores & dolores præire. Cur ergò præcedere tu vis ad honores, ad delicias? Quantum abes à Spiritu Christi! Mirare, cum Apostolis, præcedentem, sed cum iisdem etiam sequere.

2. Ecce ascendimus Hierosolymam, & filius hominis tradetur principibus Sacerdotum.

G S

tum.

tum. Matth. 20. Sæpiùs aliàs, nunc iterum passionem suam prædicit Apostolis. Cur toties? Quia quod quis amat, semper habet in memoria, libenter de eo loquitur. Non est tibi in memoria passio Christi, quia pati non amas. Patiendum tamen est necessitate quadam. Noli pati ut brutum, ut dulcius patiaris. Memento patientis Jesu. 2. Ut ad aliquos patiendum discipulos animaret exemplo suo, qui simul ascendebant. Qui cum Christo ascendit, seu ad virtutem, seu ad celestem Hierusalem, pati debet. Sed non solum habet secum Christum, cujus vel memoria cruciatus lenit.

3. *Et ipsi nihil horum intellexerunt.* Luc. 18. Terrena adhuc sapiebant, & magnificiebant ea, quæ mundus æstimat, delicias, honores, gloriam, &c. à contemptu autem contumeliis & doloribus abhorrebant. Animus, qui terrena sapit, non percipit, quod Deus æstimat. Unde tu tam avidus es in meditatione vitæ & mortis Christi? Quia non habes æstimationem & amorem contemptus & afflictionum; sed honorum, vanitatum & delectationum sensus. Desce in sapientiam tuam, & disce ab optimo Magistro pati: Quia non est discipulus supra Magistrum. Matth. 10.

* *
*

SAB.

S A B B A T H O.

Præparatio ad solennem ingressum
in Hierusalem.

1. **E**T ascendens Jesus Hierosolymam, assumpsit duodecim discipulos Matt. 20. Non ignorabat Christus decrevisse Judæos, ut eum dolo tenerent & occiderent. Marc. 14. Voluit tamen Hierosolymam solenniter ingredi, & cum ea pompa, quæ à Prophetis de Messia prædicta fuit. 1. Ut ostenderet se verum esse Messiam, & præberet se agnoscendi occasionem, ut inexcusabiles essent, si non ut talem venerarentur. Omnibus enim dat Deus gratias, non omnes accipiunt. Stude, ut oblatas accipias: time, si negligas. 2. Ut ostenderet, non posse Judæos exequi decretam mortem, nisi ipse velit. A Deo pendet, quidquid decreveris. Ejus ergò gubernationi te in omnibus cõmitte.

2. *ite in castellum quod contra vos est, & statim invenietis asinam alligatam, & pulum cum ea, solvite, & adducite mihi. Et quis vobis aliquid dixerit, dicite, quia Dominus his opus habet* Matth. 21. Ostendit Divinitatem suam, significando absentia: Crede non abesse à te. Adora. Ama Time. 2. Exercet dominium, quod habet in omnes res creatas, Et tu huic subjectus es. Patere cum

in te dominari. Cum interna te cogitatione monet, ut frangas appetitum, ut subdas voluntatem, ut linguam modereris, cogita has asinas esse, & tibi dici: *Dominus his opus habet.* Negabisne hoc illi?

3. *Euntes autem discipuli, fecerunt sicut praecepit illis Jesus, & adduxerunt asinam & pullum.* Ibid. Obediunt Apostoli perfectè; sicut praecepit; nec ullam movent ulterius quæstionem. Par fuit promptitudo domini illorum jumentorum. Audito enim, quòd *Dominus his opus habet;* nec qui sint, nec à quo missi, nec causam, nec tempus quærit. En bonam in utrisque voluntatem faciendi, quòd placet Domino. Examina quàm bona sit tua, quàm prompta ad bonas suggestiones. Dispone eam, ut sit melior.

DOMINICA SEXAGESIMÆ.

Triumphalis ingressus Christi in Hierusalem.

1. **I**mposuerunt super eos vestimenta sua, & desuper eum sedere fecerunt. *Plurima autem turba straverunt vestimenta, &c.* Matth. 21. Considera obsequia discipulorum, & turbarum officia in textu enumerata. Quis excitavit turbam, quæ non ignorabat principes in Christum conjurasse? nisi qui